



山西名勝志卷之五

閩中曹學佺能始著

大同府

隸山西布政司

領州四縣七

大同縣

附郭

周之大同川地也唐天寶元年于此置

大同軍節度使秦之雲中郡漢之平城縣遼金之

別都也冀州圖云古平城在白登臺南三里漢書

匈奴昂頓南踰句注攻太原高帝自將擊之至平

城昂頓縱精兵三十萬圍高帝于白登七日故當

時諺曰平城之下亦良苦七日不食不能殼弩按

志云白登山在府城東七里○寰宇記云元魏道

武帝徙都平城置司州牧及代尹有行宮在都田
貴山俗曰河頭殿按後魏西京卽雲中城也宮垣
有臺東西對峙蓋雙闕之制云又有方山宮永固
陵俱在郡城西北五十里方山上北史魏文帝母
馮太后遊方山顧川阜有終焉之志因築永固石
室曰百歲後神其安此乎○志云魏宮垣在府城
北門外有土臺東西對峙卽雙闕處後爲天王寺
○遼金宮垣在府城西門亦有二土臺如雙闕之
制路寢之基猶存城內有保安殿金大定中建城
西北隅有粧褵樓相傳遼時蕭太后所勅○南堂
寺在治東南一名永寧寺建自後魏內有金玉像
高一丈八尺外有九級浮圖高九十餘丈上刹復
高十丈鈴鐸聲聞十里○華嚴寺在城西門實建
于遼內有南北閣東西廊北閣下銅石像數尊中
石神主五男三女二銅神主六男四女二內一銅
人袞冕帝王之像垂足而坐餘皆巾幘常服危坐
舊傳乃遼帝后真形也重熙七年建薄伽教藏于
正殿東南 國朝洪武三年改正殿爲大有倉二
十四年卽教藏置僧綱司而寺復立焉○注水經
云雲中御河水西流合桑乾河水郡國志以爲如

渾水也一名御河其水兩源合而爲一歷府城東南流與武川水合注桑乾河武川水源出縣西二十里之武川山水溢峪中有石窟寺謂之石窟寒泉魏孝文帝所遊幸也流至府城南注如渾水○寰宇記引唐書貞觀十四年勅自朔州北界定襄城移雲州及定襄縣于此按定襄城在治西北二十八里漢定襄郡也領定襄成樂等縣有成樂城後魏初拓拔力微都此號盛樂城一名石盧城唐于此置振武軍因爲振武縣矣又西北二十里有平地縣城本金平地裊設在石碌山下其山出石

碌故名元始置縣 國初廢○志云陰山道青坡道皆在定襄城北冀州圖云雲中城周廻十六里北去陰山八十里南去漢長城百里卽白道川也白道川當原陽鎮北高阪有土穴出泉古曲云飲馬長城窟卽此欲至山上當道有千餘步地土白如石灰遙望百里卽見之皆陰山路矣長城在府城北十里大同以西紫河以東橫亘而至碣石連綿千餘里崔豹古今注云秦築長城土色皆紫故稱爲紫塞也○青陂道自平城東南四十里西北出至紇真山東北斜向平城西門東出經白登山

南一百步仍東回二十里出渴鉢口更北行六十
 里至陽門口其道始魏聖武田于山澤神自天降
 聖武感而生男即神元帝魏始祖也按梁元帝橫
 吹曲有朝跋青陂道暮上白登臺之句即此○紇
 真山在治東北五十里胡言紇真猶漢言千里也
 其山冬夏積雪諺曰紇真山頭凍殺雀何不飛去
 生處樂又有神泉人歌曰紇真山頭有神井入地
 千尺絕骨冷○寰宇記云平城馬邑凌原二丈積
 水五十尺唾出口成冰牛凍角折然火山熒泉于
 中是出注水經云西溪水導源火山山有火井南
 北七十步廣減尺許深不見底炎熱上升常若雷
 霆發響以草爨之則烟騰火發亦名熒臺井東五
 六尺又有湯井廣輪與火井相狀熱勢亦同以草
 內之皆沾濡露結故俗以湯井為日井北百步有
 東西谷廣十許步南崖下有風穴劣容數人其深
 不測穴中蕭蕭常有微風雖三伏亦須重裘○舊
 經云郡內有漢三都尉理所有唐三受降城城朔
 方總管張仁愿所築也冀州圖云桐過城在郡西
 五十里漢縣即中部都尉理所武進故城在郡東
 一百四十里漢西部都尉理所北學城鎮在郡北

四十里漢右部都尉理所○東受降城在廢東勝州東北八里隋之勝州也東北有河濱關唐河濱縣設焉其津曰君子津詳水經注下○自東受降西行三百里至中受降城卽漢九原縣地唐之雲中都督府也仍置橫塞軍于城內遼改爲雲內州州有夾山與古豐州之黑山竝峙山有九十九泉流爲黑河又有紫河在豐州之黑峪口流入雲內州注黑河黑河源出官山西流至東勝州入黃河黃河北遶東受降城歷廢武州二百五十里南流入太原之保德州界○自中受降西北八十里至西受降城卽漢之五原郡也治九原縣隋改爲豐州矣志云今府城北四百餘里有七寶山山下有城相傳卽漢五原郡城入塞圖云從平城西北行五百里至雲中又西北五十里至五原又西北行二百五十里至沃野鎮又西北行二百五十里至高闕又西北二百五十里至郎君戍又直北三十里至燕然山按沃野者其地沃良沙土盡黑功省穫倍每至七月皆熟隋富民縣設焉高闕塞在豐州河之西趙武靈王築長城自代傍陰山下至高闕者也唐書地理志云雲中都護府有燕然山

上有李陵臺蓋陵思漢不得歸登此以望故鄉又謂之拂雲堆矣漢書竇憲出雞延塞鄧騭出稠陽塞遂至燕然山云五原有延雞郎君二城皆漢時戍守之地又有沙井在豐州西北其外卽沙陀地城塚記云王昭君青塚在豐州西六十里地皆白草此塚獨青故名青塚唐杜甫詩一去紫臺連朔漠獨留青塚向黃昏○水經注曰羊水出平城縣西苑外武周塞北東轉逕燕昌城南按燕書建興十年慕容寶軍敗于叅合死者六萬人十一年垂衆北至見積骸如山設祭吊之禮死者父兄皆號泣哀慟垂慚憤嘔血因而寢疾舉過平城北四十里疾篤築燕昌城而還北俗謂之老公城羊水又東注于如渾水亂流逕方嶺上有文明皇太后陵東北有高祖陵二陵之南有永固堂堂之四周隅雉列榭階欄及扉戶梁壁椽瓦悉文石也檐前四柱採洛陽八風谷黑石爲之雕鏤隱起以金銀間雲雉有若錦焉內外四側結兩石跌中有青石屏風竝隱起忠孝賢像題刻貞順之名廟前鐫石爲碑獸在冢左右列栢四周迷禽暗日院外西側有思遠靈圖圖之西有齋堂南門表二石闕闕下斬

山累結御路下望靈泉宮池皎若圖鏡矣羊水又東注如渾水又南至靈泉池池東西一百步南北二百步池渚舊名白楊泉上產白楊樹因以名焉其猶長楊五柞之流稱矣南面舊京北背方嶺左右山源亭觀繡峙方湖返景若三山之倒水也如渾水又南逕北宮下舊宮人作薄所在如渾水又南分爲二水一水西出南屈入北苑中歷諸池沼又南逕虎圈東魏太平真君五年成之以牢虎也季秋之月觀御圈上勅虎士効力於其下事同奔戎生制猛獸卽詩所謂袒楊暴虎獻于公所故魏有捍虎圖矣又逕平城西郭郭外有郊天壇壇側有碑建興四年立其水又屈逕平城縣故城南史記曰高帝先至平城史記音義曰在雁門卽此縣矣王莽之平順也魏天興二年遷都于此太和十六年造太極殿及朝堂夾建象魏東西掖門皆飾以觀閣近東接和殿殿階下有一碑卽太和中立殿之東北接紫宮寺寺對承賢門門南爲皇信堂四周圖古聖忠臣烈士之容刊題其側是辯章郎彭城張僧達造堂南對白臺臺甚高廣列壁閣路自內而升國之圖錄秘籍咸積其下臺西卽朱明

閣直侍之官出入所由也如渾水右合火山山西谿水其水東北流合武州水武州水又東南流水側有石祗洹舍并諸窟室比丘尼所居也其水又東轉逕靈巖南鑿石開山因崖結構真容巨壯世法所諦山堂水殿煙寺相望林淵錦鏡綴目新眺川水又東南流出山魏土地記曰平城宮西三十里武周塞口者也自山口枝渠東出入溉諸園池苑囿一水自枝渠南流東南出火山水注之水發火山東谿東北流出山山有石炭以水鍊之熾同樵薪矣又東注武周川逕平城縣東南流注如渾水又南逕白登山西服虔曰白登臺名也去平城七里平城傍之若丘陵焉今平城東十七里有臺卽白登臺臺南對罡阜卽白登山孫暢之述畫曰漢高祖被圍七日陳平使能畫作美女送與冒頓闕氏恐冒頓勝漢其寵必衰說冒頓解圍于此矣其水又逕寧先宮東獻文帝之爲太上皇所居故宮也宮之東次下有趙石虎鄴城東門石橋柱建武中造以其石作工妙徙之于此余爲尚書祠部與宜都王穆羆同拜北郊親所經見柱側悉鏤雲烟上作蟠螭甚肖形狀去子丹碑側遠矣其水又南

逕平城縣故城東司州代尹治皇都洛陽以爲恒
州水左有大道壇廟姑光二年少室道士寇謙所
建兼諸嶽廟碑亦多其署立廟階三成四周欄檻
土階之上豎木爲圓基令干相枝梧以板砌之欄
陛承阿上員之制準于明堂專室四戶室內有神
座座右列玉磬皇輿親降受錄靈壇壇之東北舊
有靜輪宮神麈四年造抑亦栢梁之流亞也臺榭
高廣超出雲間欲令上延霄客下絕囂浮太平真
君十一年又毀之物不停固白雲亦繼褫矣水右
有二層浮圖真容鷲架結石爲之銅鏤麗質厥盡

美善庭中有祇洹碑題大篆不必爲佳然京邑帝
里佛法豐盛神圖妙塔禁峙相望法輪東轉茲爲
上焉其水自北苑南出歷京城內河干兩澹恣累
石結崖夾塘之上雜樹交蔭郭南兩石橫水爲梁
又逕籍田及藥園東西明堂上圓下方四周十二
戶九堂而不爲重隅也室外柱內綺井之下施機
輪飾縹碧仰象天狀畫北辰列宿每月隨斗所建
之辰轉應天道加靈臺于其上下則引水爲辟雍
矣○注水經又云河水出塞外西逕定襄武進縣
故城北西部都尉治王莽更名代蠻世祖建武中

封趙慮為侯國白渠水西北逕成樂北郡國志曰
 成樂屬定襄魏土地記曰雲中城東八十里有成
 樂城今雲中郡治一名石盧城也白渠水又西逕
 魏雲中宮南魏土地記曰雲中宮在雲中故城東
 四十里白渠水又西南逕雲中故城南虞氏記云
 趙侯自五原河曲築長城東至陰山故趙地矣又
 于河西造大城一箱屢崩不就乃改卜陰山河曲
 而禱焉晝見群鵠遊于雲中徘徊經日見天光在
 其下武侯曰此為我乎乃即于其處築城今雲中
 城是也秦始皇十三年立雲中郡縣曰遠服矣白

渠水又西北逕沙陵縣故城南王莽之希恩縣也
 其水西注沙陵湖又有芒于水出塞外南逕鐘山
 鐘山即陰山故郎中侯應言于漢曰陰山東西千
 餘里單于之苑囿也自孝武出師攘之于漠北匈
 奴失陰山過之未嘗不哭水出山南逕武臯縣王
 莽之未武矣又南逕原陽縣故城西又西南與武
 泉水合其水東出武泉縣故城西南縣即王莽之
 順泉也水南流又西屈逕北輿縣故城南地理志
 曰五原有南輿縣故此加北舊中部都尉治其水
 又西南入芒于水西南逕白道南側帶長城背山

面澤謂之白道南谷口有城自城北出有高阪謂之白道嶺嶺上土穴出泉挹之不窮余每讀琴操見琴慎相和雅歌錄云飲馬長城窟及其攀陟斯途遠懷古事始知信矣顧瞻左右山上有垣若烈基焉泂谿巨嶺東西無極疑趙武靈王之所築也芒于水又西南逕雲中城北白道中谿水注之水發源武川北塞中其水南流逕武川鎮城以景明時築禦北狄于此其水西南流歷谷逕魏帝行宮東世謂之阿計頭殿宮城在白道嶺北阜上其城圓角而不方四門列觀城內唯臺殿而已其水又西南歷中谿出山西南流于雲中城北南注芒于水芒于又西塞水出懷朔鎮東北芒中南流逕廣德殿西山下余以太和十八年從高祖北巡屆于陰山之講武臺臺之東有高祖講武碑碑文是中書郎高聰辭自臺西出南上山山無樹木唯童阜耳卽廣德殿所在也其殿四柱兩厦堂宇綺拱圖畫竒禽異獸殿之西北便得焜煌堂雕楹鏤角狀古之温室也其時帝幸龍荒遊鸞朔北南秦王仇池楊難當捨蕃委誠重譯拜闕陛見之所故以廣德爲名魏太平真君三年刻石樹碑勒宣時事碑

頌云肅清帝道振攝四荒有蠻有戎自彼氏羌無
思不服重譯稽顙恂恂南秦斂斂推亡峨峨廣德
奕奕焜煌侍中司徒東郡公崔浩之辭也碑陰題
宣城公李孝伯尚書盧遐等從臣姓名其水歷谷
南出陰山西南入芒于水芒于水又西南注沙陵
湖湖水西南入于河河水濟有君子之名昔漢桓
帝十三年西幸榆中東行代地洛陽大賈齋金貨
隨帝後行夜迷失道往投津長田子封送之渡河
賈人卒死津長埋之其子尋求父喪發冢舉尸資
費一無所損其子悉以金與之津長不受事聞帝

曰君子也即名其津為君子濟去雲中城西南二
百里○志云古大同城在白羊川有白羊城今為
虜所沒因設白羊堡以鎮之古玉林衛今之大同
右衛是雲門衛今之左衛是也我正統間主將怠
守虜騎突來接鬪不支因徙于此東西有天成威
遠二衛天成東南有晚霞山勢最高聳日落之後
返照成霞故名又以其形似蓮花亦曰蓮花山城
西北角百餘步有泉一人汲之不溢百人汲之不
窮俗謂之湧泉○威遠衛去郡西百二十里城南
百五十步有滄頭河再一百八十里之駱駝山下

有兔毛河俱由東勝州入黃河又一里為大鹽灤
沒越灤即古豐州治

懷仁縣 在府城南 七十里

五代晉李克用與阿保機會于東城有懷想仁人
之語故縣取名焉遼始置本雲中縣地也縣有清
涼山在城西二十里錦屏山在西南二十五里又
十里為金龍山此山泉與馬邑金龍池脉相通故
名又有玉龍山在城西北四十里中有七峰石洞
天橋皆自然之勝○志云灰泉在縣東二十五里
元大德間地震漂出松柏朽木即此泉也神泉在

縣北四十里泉有二眼其味甚甘又有沙泉在縣
治內魏設縣曰莎泉本此○唐張仁愿祠在縣儀
門即築受降城者縣西南五十里有偏嶺口過此
有大峪蘆子阿毛四口皆往受降城之路也

渾源州 在府城東南 百二十里

州以川名按渾源川源出州西南嘆士峪分流至
西北界匯為大澤西流至城北五里之神溪溪中
有孤石方一畝高丈餘上有律呂神祠祠下水曲
折而西北入桑乾河唐初置渾源縣于此宋因之
金陞為州元析置縣曰恒陰後省入○名山記云

恒山在州南二十里卽北嶽也水經謂之玄嶽舜
北巡狩至此山南有玉華峰形如削玉故名又有
翠屏山其色秀麗如屏又有栢山山高多栢一名
栢梯朱弁渾源州記云層巒疊巘林木鬱蒼中有
香爐峰突起而屹立者此栢梯之奇觀也漉水出
焉西南合溫泉水入桑乾○志云恒山高侵霄漢
其頂名天峰嶺下建北嶽觀觀側有飛石窟相傳
石自塞外飛來因建后土祠以鎮之觀前風出如
虎吼名虎風口距東南五十里有潛龍泉旱禱立
應兼能愈疾上建龍泉觀觀之東有夕陽巖巖下

有通玄谷東面有碧峰嶂東南有古老嶺嶺下有
白虎峰觀之比峰頂百餘步有琴棋臺會仙府聚
仙臺得一菴又東北有白雲堂初入山之徑名步
雲路行數里有翠雪亭上高坡曰望仙嶺半崖有
集仙洞東北有紫芝峪西南有石脂圖金元好問
詩大茂維嶽古帝孫太朴未散真巧存乾坤自有
靈境在地位豈合他山尊中原旌旗白日暗上階
樓觀蒼烟屯誰能借我兩黃鵠長袖一拂玄都門
○封龍山一名龍山在州西南四十五里夏時雨
過山氣上騰如虹故名州東北五里有玉泉山其

東連栢山山之東北有惠嶺秀麗可愛又名秀麗
峰下有黑龍池雲氣上昇不三日而雨其東有五
峰山上有三陽洞東北有玉泉山皆爲勝槩金末
李冶元好問張德輝嘗遊此山時號龍山三老○
孫贖山在州東南六十里上有孫贖寨因名相距
數里有龐涓寨舊傳孫龐二人聚兵制敵于此山
南麓有千佛洞皆鑿石而成○崞川在州東北二
十里漢設崞川縣以此流經州南十五里之麻家
庄合渾河○嘔夷水發源州東南五十里之槍峰
嶺滙峰石溝堂山諸水自西北來東南流經倒馬
關澁水出焉山海經曰澁水出高是山注水經謂
溫夷之水蓋古今異名也今名纏河○懸空寺在
州南磁窰口內石壁巉巖如削懸空結構飛閣相
望下臨無地游者股栗石峽上刻張君祥純扇若
葫蘆狀人過此雖暑熱亦似風生

應州

在府城南
百二十里

領縣一

古陰館縣漢書有下館在山之陰矣曰陰城曰金
城皆隋唐縣也唐復于縣置應州以龍首雁門二
山相應而名○按龍首山在州東北三十里山勢
南跨雲中雁門山在州南山之北與龍首相望也

南有茹越口東南有北婁口較黃沙胡峪諸口差大接界則為鹵城鹵城漢縣屬代郡東漢屬雁門郡○志云舊州城在今治東十里後唐李克用遷金城于天王村南此城遂廢城內有金鳳井相傳晉王生時有金鳳飛入故名又云劉知遠宅在州東北二十里有石甃井存○廢金城縣本漢陰館縣建安末廢唐改置金城縣 國初省改為儒學未樂間掘出金城縣印四字又有廢滄城在治西之犬定街北後因兵燹而廢○舊傳州有三岡四鎮趙霸岡在城東黃花岡在城西護駕岡在城南

安邊鎮在城東大羅鎮在城南司馬鎮在城西神

武鎮在城北元好問詩南北東西俱有名三岡四

鎮護金城○志云雲山在州東南四十里又十里

為翠微山○黃花嶺在州西北三十里龍灣山在

州南四十里上有龍池西南距越嶺連繁時界又

五里為香峰山上有香峰古寺及石甃井其水入

桑乾河○水經注云濕水出雁門陰館縣東北過

代郡桑乾縣南地理志曰濕水出累頭山一曰治

水泉發于山側沿坡歷澗東北流出山逕陰館縣

故城西縣故樓煩鄉也漢景帝後元三年置王莽

更名富臧矣魏天安三年齊平徙其民于縣立平齊郡濕水又東北流左會桑乾水縣西北上平洪源七輪謂之桑乾泉卽涑涑水者也耆老云其水潛承太原汾陽縣北燕京山之天池

山陰縣

在州西六十里

本陰館縣地金析置今縣亦以陰館而名○縣南二十五里復宿山古碑云文殊大師經行留宿之處一名佛宿山山下出水名何家泉縣北四十里黃花嶺一名黃瓜堆後魏文帝于嶺上築三城俗以日沒城爲黃昏城早起城爲雞鳴城併日中城爲三縣西南十五里忠州城卽山陰之古城也城外有龍灣谷黃水河出焉流注桑乾水○水經注曰武州塞水出故城東南流出山逕日沒城南蓋夕陽西頽戎車所薄之故城也東有日中城城東又有早起城亦曰食時城在黃瓜阜北曲中其水又東流右注桑乾水桑乾水又東南逕黃瓜阜曲西又屈逕其堆南徐廣曰猗盧廢嫡子曰利孫于黃瓜堆者也又東右合枝津津上承桑乾河東南流逕桑乾郡北大魏因水以立郡受厥稱焉又東北左合夏屋山水水南出夏屋山之東豁西北流

山西各縣志

逕故城北又西北入桑乾枝水枝水又東流津委浪通結兩湖淵潭相接水至清深晨鳧夕雁泛濫其上黛甲素鱗潛躍其下俯仰池潭意深魚鳥所寡唯梁木耳俗謂之南池池北對涅陶縣之故城南故曰南池也池水又東北注桑乾水爲濕水並受通稱矣濕水又東北逕魏亭西蓋魏天賜三年所經建也濕水又東北逕白狼堆南魏烈祖道武皇帝于此遇白狼之瑞故阜納稱焉阜上有故宮廟樓榭基雉尚崇每至鷹隼之秋羽獵之日肆閱清野爲昇眺之逸地矣濕水又東流四十九里東

逕巨魏亭北又東崢川注之按志龍門山在縣南三十里亦名隘門上有御射臺後魏文成帝嘗較射于此有碑記其陰刻從臣姓名

朔州

在府西南二百八十里

領縣一

搜神記云昔秦人築城于武州塞內以備胡城將成而崩者數矣忽有馬馳走周旋反覆父老異之因依馬跡以築城城乃不崩遂名馬邑寰宇記云馬邑城卽州理也史記漢高帝以韓王信居太原郡爲韓國以備胡信以晉陽去塞遠請理馬邑卽此城矣按忠馬邑城在今州城之東又有新城鮮

單猗盧所都晉劉琨表鮮卑猗盧封代公徙馬邑是也後魏始都代孝文遷洛之後于州北三百八十里定襄故城置朔州高齊天保六年移置州西南四十七里之新城卽猗盧城八年乃移馬邑○志云鄯陽廢城在州城西北隅古城內本秦馬邑隋改鄯陽 國初省入州○州境內有梁郡城冀州圖云在治北二十里卽爾朱榮所居秀容川也白樓在此城內十六國春秋後魏納姚興女爲后建此樓以望故國飾以鉛粉故名○安邊城唐開元十七年置安邊縣在橫野軍內其後移理不定

○太平城後魏穆帝所理冀州圖云太平城上埤垣却敵東西南北各十里內有統萬所送大釜二口各受二百石城外有元姬山道武侍人李姓者善謳死葬此山魏主思之命樂府製曲傳焉○大同城一統志云州北界之牟那山隋大同城之舊墟也附近爲耳背城及秦長城俱在山麓去州三百里按今屬新平堡邊外黃台吉五路部落所居○武州城在州西一百五十里本趙武州塞漢晉之新城縣也後唐李克用生于神武川之新城卽此冀州圖云武州山在郡西北東西數百里南北

厚五十里山之南面千仞壁立有神武尖其別峰之一耳賀拔氏宗族居之又西二峰曰東靈曰白羊金蕭融為武州刺史嘗于東靈建臺榭以備遊觀白羊谷中水即武州川之源也東南流至府城南十五里注如渾水○寧武城在州西南七十里之翠峰山東連石碣北接馬驥西至陀羅臺南即寧武軍口盤踞凡二百餘里州南三里之灰河源出此山口北流至洪岸村伏流十五里湧出經城南入桑乾水九邊輯畧云寧武關之陽方口極衝虜窺東中二路必由此入近移總戎于此以為適

中之地○葛榮城城中有揚泉冀州圖云後魏太和中文明皇太后來幸遂釣鯉魚一雙長三尺以黃金為鎖穿腮放于池內後皆長五尺其一浮天為五色虹而去久之乃滅後一在池至孝昌元年六月行臺元淵北伐頓此決池取魚鱗甲非常淵忌而殺之得金二斤八兩淵來年為葛榮所殺因築城以處之○水經注曰馬邑川水東逕馬邑故城南或謂代之馬城也漢以斯邑封韓王信後為匈奴所圍信遂降之至武帝時馬邑豪聶壹因大行王恢言遣將車騎材官匿馬邑旁谷中以致匈

奴匈奴入武州塞始覺大驚引兵還漢將追之不
及卽斯處矣其水流注桑乾水桑乾水又東南流
水南有故城東北臨河又東南右合濕水亂流枝
津南分桑乾水又東左合武周川水水出縣西南
山下二源翼導俱發一山東北流合成一川北流
逕武州縣故城西王莽之桓州也又東北右合黃
山水西出黃阜下東北流聖山之水注焉水出聖
山東流注于黃水黃水又東注武周川又東歷故
亭北會如渾水如渾水夾御路南流逕蓬臺西魏
神瑞三年毀以建白樓樓甚高竦加觀榭于其上

表裏飾以石粉皜羅縠紛故世謂之白樓也後置
大鼓于其上晨昏伐以干椎爲城里諸門啓閉之
候謂之戒晨鼓又南逕皇舅寺西是太師昌黎馮
公晉國所造按後魏書馮熙字晉國文明太后兄
也官定州刺史進爵昌黎王在諸州鎮建佛圖精
舍合七十二處孝文卽位爲侍中太師寺有五層
浮圖神圖像皆合青石爲之加以金銀火齊衆綵
之上燁燁精光如渾水又南逕永寧七級浮圖其
制甚巧工緻寡雙又南遶出郊郭弱柳蔭街絲楊
被浦公私引裂用周圍繞長塘曲池所在布護故

不可得而殫述矣○隋薛道衡反命河朔始入武州輕車初逐李定遠未隨班受詔祈連返申威疎勒還飛蓬損腰帶秋鬢落容顏寄信舊相識知余生入關唐釋無可送李騎曹之武寧一歲一歸寧涼天數騎行河來當塞曲山遠與沙平縱獵旗風卷聽茄帳月生新鴻引塞色廻日滿京城

馬邑縣 在州東四十里

口大同城也唐于此置馬邑縣取古馬邑為名建中間嘗徙朔州治此○縣西北十里洪濤山一名累頭山灑水出焉即桑乾之源也漢書謂之治水

水經謂之潦涪水矣又北有雷山上源泉水出焉西北有金龍池盧灣泉龍泉寺水皆合注之○志云紫金山在縣南連亘數百里極為險要廣武城在其下漢書韓王信與匈奴屯廣武以南是也縣西北有魯臺世傳唐李靖築以觀星者縣東南六十里有太和嶺嶺北口西山十里有雁門關兩崑崙拔中路盤旋崎嶇以達山頂置關戍守焉附近有佳吉楊六郎各寨○九邊輯畧云古大同城在大同山上今離新平堡外一百五十里黃台吉五路部落駐此極強悍夏移聚白海子○圖經云桑

乾河源出縣北洪濤山下與金龍池水合流經山陰應州大同縣界東南入蘆溝河又按水經其河源自太原汾陽北下之天池伏流至朔州馬邑縣雷山之陽滙為七泉曰上源曰玉泉曰三泉曰司馬洪濤曰金龍池曰小盧曰小浦七泉合而為一是謂桑乾河之源由縣治之西東南流朔州北有七里河西北下峪有獵河南山有灰河及雁門關太和嶺凡水自南而北者悉歸之過應州則渾源水自東來至順聖則葫蘆河水注之經廣靈靈仙定安而西以至灃陽之楊河懷來之瀉河又滑石

之水自東北來者及山西之水皆合是為合河至宛平縣境分而為二一從葫蘆溝東南入海一從金口絡都城東合白河入海此河之源委也唐賈島詩客舍并州已十霜歸心日夜憶咸陽無端更渡桑乾水却望并州是故鄉

蔚州 在府東南三百五十里 領縣三

周宣帝始置蔚州古代郡也漢高帝元年項羽徙趙王歇為代王今有代王城在州東二十里一名參合城韓王信以馬邑降胡與胡同居參合漢將軍柴武屠其城是也○志云九官山在州東三十

里口通易州玉屏山在州北六十里西接襄山鴛鴦口在州東六十五里兩山相峙如鴛鴦然路通保安右衛○倒刺山在州東七十里又號雪山俗傳靈仙所居與五臺山畧等按五代晉改興唐縣爲靈仙以此志云一名太白山上有奇石形如馬頭俗謂之馬山旁有石洞產赤土相傳周穆王乘七駿至此而斃其血化爲土也○高是山在州西北七十里山海經云高是之山滋水出焉又嘔夷河源亦出此山周禮并州川曰嘔夷是矣嘔夷河亦曰瓠瓠河上槽狹下流濶有似瓠瓠故名○滋水在州西南三十里之南馬庄名流水泉東北流入壺流河州西有煖泉其水夏涼冬温又西十里許有飲馬泉父老傳云唐太宗飲馬于此州北界天城內之海水泉及舊州代王城內金波泉俱流注之雜志曰代王城周廻二十九里九門遺址俱在金波泉發源其北夾城東南流卽搜神記所謂初築時亡西南板于澤中自立者也○志云定安廢縣在州東七十里本漢代郡東安陽縣詳水經下又弘州城在州西北九十里漢陽原縣唐之安邊郡也遼置此州今之弘賜堡沿其名○水經注

云如渾水又南流逕班氏縣故城東王莽之班副也闕駟曰班氏在郡西南百里北俗謂之去留城如渾水又東南流注于濕水濕水又東逕平邑縣故城南趙獻侯十三年城平邑地理志曰屬代王莽所謂平胡矣十三州志曰城在高柳南八十里俗謂之醜寅城濕水又東逕沙陵南魏金田之地也事同曹武定鄴中矣濕水東逕猗氏縣故城北漢書孟康注云猗氏字音權精王莽更名之曰猗聚也十三州志曰縣在高柳南百三十里俗謂之苦力干城濕水又東逕道人縣故城南地理志曰

王莽之道仁也地理風俗記曰初築此城有仙人遊其地因以爲名城北有淵潭而不注故俗謂之平湖濕水又東逕陽原縣故城南地理志曰代郡之屬縣也俗謂之北郝城濕水又東東陽水注之水出縣東北澤中俗謂之太拔迴水水自源東南流注于濕水又東逕東安陽縣故城北趙惠文王三年封長子章爲代安陽君此卽章封邑王莽之競安矣地理風俗記曰五原有西安陽故此加東濕水東逕昌平縣溫水注之水出南墳下三源俱導合而南流東北逕濕水濕水又東逕昌平縣故

城北王莽之長昌也昔牽昭爲魏鮮卑校尉屯此濕水又東北逕桑乾縣故城西又屈逕其城北王莽更名之曰安德魏土地記曰代城北九十里有桑乾城城西渡桑乾水去城十里有溫湯魏任城王彰以建安二十三年伐烏丸涿郡逐北遂至桑乾止于此矣水又東流祁夷水注之水出平舒縣東逕平舒縣故城南澤中史記趙孝成王十九年以汾門予燕易平舒徐廣曰平舒在代王莽更名之曰平葆後漢世祖建武七年封陽武將軍馬成爲侯國其水控引衆泉以成一川魏土地記曰代

城西九十里平舒城西南五里代水所出東北流矣祁夷水又東北逕蘭亭南又東北逕石門關北舊道出中山故關也又東北流水側有故池按魏土地記曰代城西南三十里有代王魚池池西北有代王臺東去代城四十里水西北流逕南舍亭西又逕句璪亭西西北注祁夷水祁夷水又東北流逕城西盧植言初築此城板幹一夜自移于此故乃就以爲治城圓匝而不方周四十七里開九門更名其故城曰東城趙滅代漢封孝文爲代王王莽更之曰厭狄亭魏土地記曰城內有二泉

一源流出城西門一源流出城北門二源皆北注
代水祁夷水又東北熱水注之水出綾羅澤澤際
有熱水亭其水東北流注祁夷水又東北谷水注
之出昌平縣故城南又東北入祁夷祁夷右會逆
水水導源將城西北流逕將城北在代城東北
一十五里疑卽東代矣逆水又西注于祁夷之水
逆之爲名以西流故也祁夷水東北逕青牛淵水
自淵東注之耆諺云有潛龍出于茲浦形類青牛
焉故淵潭受名矣祁夷水又北逕一故城西西去
代城五十里又逕昌平郡東魏太和中置西南去
故城六十里又北連水入焉水出離稽縣東西北
流逕離稽縣故城南又西到刺山水注之水出到
刺山西山甚層峻未有升其巔者魏土地記曰代
城東五十里有到刺山山上有隹大黃其水北流
逕一故亭東城北有石人故世謂之石人城西北
注連水又北逕當城縣故城西漢書高祖十二年
周勃定代斬陳豨于當城應劭曰當桓都山作城
故曰當城也又逕故代東而西北流注祁夷水祁
夷水西有隨山山上有神廟謂之女郎祠祁夷水
又北逕桑乾故城東而北流注于濕水地理志曰

邾夷水出平舒縣北至桑乾入濕是也濕水又東北逕石山水口水出南山北流逕空侯城東魏土地記曰代城東北九十里有空侯城其水又東北流注濕水濕水又東逕潘縣城北東合協陽關水水出協溪魏土地記曰下洛城西南九十里有協陽關關道西通代郡其水東北流歷笄頭山關駟曰笄頭山在潘城南卽是山矣又北逕潘縣故城左會潘泉故瀆瀆舊上承潘城中或云舜所都也魏土地記曰下洛城西南四十里有潘城城西北三里有歷山山上有虞舜廟十三州記曰廣平城

東北一百一十里有潘縣王莽更名樹武其泉縱廣十數步東出城注協陽關水雨盛則通注陽旱則不流惟泝泉而已關水又東北流注于濕水又東逕雍洛城南魏土地記曰下洛城西二十里有雍洛城桑乾水在城南東流者也濕水又東逕三臺北濕水又東逕無鄉城北地理風俗記曰燕語呼亡爲無今改爲宜鄉濕水又東溫泉水注之水

上承溫泉于橋山下魏土地記曰下洛城東南四十里有橋山下有溫泉泉上有祭堂雕簷華宇被于浦上石池吐泉湯湯其下炎涼代序灼焉無改

能治百疾池水北流入于濕水濕水又東左得于延水口水出塞外于玄鎮西長川城南小山山海經曰梁渠之山無草木多金玉修水出焉東南流逕且如縣故城南應劭曰當城西北四十里有且如城故縣也代稱不拘名號變改校其城郭相去遠矣地理志曰中部都尉治于延水水出縣北塞外卽修水也修水又東南逕馬城縣故城北漢東部都尉治十三州志曰馬城在高柳東二百四十二里俗謂是水爲河頭河頭出戎方土俗變名耳又東逕零丁城南右合延鄉水水出縣西山東逕延

陵縣故城北地理風俗記曰當城西北有延陵鄉故縣也俗指謂之琦城川又東逕羅亭又東逕馬城北又東注修水又東南流逕大寧郡北右注雁門水山海經曰雁門之水出于雁門之山雁出其間在高柳北高柳在代中其山重巒疊巘霞舉雲高連山隱隱東出遼塞其水東南流逕高柳縣故城北舊代郡治秦始皇王二十三年虜趙王遷國爲郡王莽之所謂厭狄也建武十九年世祖封代相堪爲侯國昔牽招斬韓忠于此處魏志牽招字子經太祖辟爲從事遣詣柳城時韓忠爲公孫康使

者擅拜峭王爲單于招提忠頭頓築拔刀欲斬之
峭王驚怖抱招救請跪伏受勅教焉其城在平城
東南六七十里于代爲西北也雁門水又東南流
屈逕一故城背山面澤俗謂之叱嶮城雁門水又
東南流屈而東北積爲潭其陂斜長而不方東北
可二十餘里廣一十五里蒹葭叢生焉敦水注之
其水導源西北少咸之山南麓東流逕參合縣故
城南地理風俗記曰道人城北五十里有參合鄉
故縣也敦水又東泚水注之出東阜下西北流逕
故城北俗謂之和堆城又北合敦水亂流東北注

雁門水故山海經曰少咸之山敦水出焉東流注
于雁門之水郭景純曰水出雁門山謂斯水矣雁
門水又東北入陽門山謂之陽門水與神泉水出
葦壁北水有靈神及其密雲不雨陽旱愆期多禱
請焉水有二流世謂之比連泉一水東北逕一故
城東世謂之石虎城而東北流注陽門水又東逕
三會亭北又東逕西伺道城北又東託台谷水注
之水上承神泉于葦壁北東逕陽門山南託台谷
謂之託台水汲引泉谿澤濤東注行者間一十餘
渡東逕三會城南又東逕託台亭北又東北逕馬

頭亭北東北注雁門水雁門水又東逕大寧郡北魏太和中置有修水注之卽山海經所謂修水東流注于雁門水也地理志有干延水而無雁門修水之名自下亦通謂之于延水矣水側有桑林故時人亦謂是水爲藜桑河也北土寡桑至此見之因以名焉于延水又東逕罽城南按史記燕人蔡澤謝病歸相秦號罽成君疑卽澤所邑矣世名武罽城延水又東左與寧川水合水出西北屈東南流逕小寧縣故城南地理志云寧縣也西部都尉治王莽之博康矣魏土地記曰大寧城西二十里有小寧城昔邑人班丘仲居水側賣藥于寧百餘年人以爲壽後地動宅壞仲與里中數十家皆死民人取仲尸棄于延水中收其藥賣之仲被喪出從而詰之此人失怖叩頭求哀仲曰不恨汝故使人知我耳去矣後爲夫餘王驛使來寧北方人謂之謫仙也于延水又東黑城川水注之水有三源出黑土城西北竒源合注總爲一川東南逕黑土城西又東南流逕大寧縣西而南入延河延河又東逕大寧縣故城南地理志云廣寧也王莽曰廣康矣魏土地記曰下洛西北百三十里有大寧城

于延水又東南逕茹縣故城北王莽之穀武也世謂之如口城土地記曰城在鳴鷄山西十里南通大道西達寧川于延水又東南逕鳴鷄山西土地記曰下洛城東北三十里有延河東流北有鳴鷄山趙襄子殺代王于夏屋而奔其土壤子迎其姊于代姊曰代已亡矣吾將何歸遂磨笄于山而自殺代人憐之爲立祠焉因名其地爲磨笄山每夜有野雞鳴于祠屋上故亦謂之鳴雞山魏土地記云代城東南二十五里有馬頭山其側有鐘乳穴在代郡東南二十五里一名磨笄山長老云昔有代王者居代城中與燕約有警相救置鼓爲信胡人入傳鼓燕救不至代王出奔國爲丘墟又曰廢城南數里小山卽鼓臺也余尋之果然仍名其處曰擂鼓塢○暖泉書院在城西三十里暖泉村元工部尚書王敏建遺基尚存

廣靈縣

在州南六十里

後唐置本開元之安邊縣地也輯說云今之鎮邊堡是兀慎台吉部落駐此地名柳溝離城六十餘里夏移駐龍會距三百餘里○志云縣西北五里有千夫山山出花斑石千人取之不盡上有神祠

民常祈福于此亦名千福山又十里爲九層山山有九層崖出泉僅許可供百餘家名一丰泉○加丰山在縣東南十五里上有圮城不知所本或傳以爲寡婦城也又其地有留老砦昔人築此以避兵亦名留老瞳○平頂山在縣北三十里其頂方平故名又有一山居中四圍七山相向謂之巧八山有滴水巖泉竇自穴中出滴水成池左近爲牛欄窩山周圍有天生石欄故名○老山在縣東北三里其山皆石百草環生若點翠然亦名翠山越三十里爲瓦房山形如瓦屋可居百人又其地

有三分砦設樺山上樺山者其山多產樺樹也○壺流川一名滋水源出縣西三十里莎泉山下其水名莎泉東注合壺川山下其水名神泉二水合流形乃如壺流經蔚州城北注順聖川入桑乾河○城南五里有集興瞳池其水清湛冬夏不竭注壺流川縣西南十五里有小河出直峪山下又五里有枕頭河發源滋雨泉出直峪山之崖孔間又二十五里有勒漢砦自家泉出焉濬源林管山下俱入壺流川○縣西十三里有作瞳池方十畝其水潛縮中約五畝遇雨雪脉動則池湧漲東注壺

流又三十七里有白羊山舊傳白羊寺遺址在焉
下有小河亦注壺川俗傳此山有泉湍瀑奔騰聲
如唾玉名曰瑞泉卽其源也○漆源泉出縣城南
里許東流合拒馬河入紫荆關又縣東南平地上
亂泉湧出上建豐水神祠東流爲葫蘆河入定安
縣西界此豐水也志云水源出天井山深五六尺
雖旱不竭有寺曰天井寺水伏流自城東南平地
始湧耳天井山西南去縣二十里漢地理志嘔夷
所經有豐水神祠是也

廣昌縣

在州南百五十里

本漢縣魏封樂進爲廣昌侯卽此在隋曰飛狐縣
以縣北飛狐口而名飛狐者相傳有狐于紫荆嶺
食五粒松子成飛仙也邢勵曰古長城在飛狐界
漢書酈食其說漢王曰杜白馬之津塞飛狐之口
皆一方之阨也謂之飛狐道晉中興書云建興中
劉琨自代出飛狐口奔于安次卽此道矣○志云
飛狐洞在縣南十里未及洞有七山相連名曰七
山河水出焉卽漆水之源也相傳宋將楊彥朗拒
敵于此亦名拒馬河縣東南二十里有山嶺以彥
朗曾插箭其上名插箭嶺○縣東南五十里有白

山山多白石其山口曰白石口又南三十里有倒馬關山路險峻馬行常歎側因名已上諸口皆通保定府之易州及唐縣界○漆水又東木瓜澗水入焉唐乾寧間李克用討燕帥劉仁恭過此一名交牙川水經注云唐昌縣南有交牙城以交牙川為名又云邠夷水西逕廣昌城南代南二百里有廣昌城西通大嶺十三州記曰平舒東九十里之廣平城是也○鑛嶺在縣東四十里山石皆鑛色其山有鐵山堡又十里為紂王城城內有比干廟又迤北十餘里為黑石山山石多黑與白石口相對○登梯山在縣西南四十里山路險峻直上如梯故名又十里為驛馬嶺又二十里為雕窩崖有洞產銅舊設銅山冶唐貞元間廢○李存孝祠在縣西北十五里交牙川側存孝晉王克用養子在唐戰功獨多後以讒死而晉王始衰存孝當邑人其鄉里為立祠○馬戴次飛狐縣作遠歸從此別親愛失天涯去國頻迴首方秋不在家鳴蜩聞塞路冷雁背龍砂西次桑乾曲洲中見荻花

靈丘縣 在州西南百五十里

本漢縣以趙武靈王葬此地也寰宇記云靈丘故

城在縣東十里又二十里爲武靈王臺土阜尚存
○縣南二里有楊六郎城其西三十里有蕭太后
城六郎城僅南一面俗傳蕭太后與六郎聚兵相
敵六郎誑其築城實逸已兵也又有歆城及水側
有莎泉亭詳水經註○志云縣有龍泉源出東北
二十里之龍泉山又有聖水泉出西北三十里之
聖水山又有黑龍河出縣西四十里之黑龍谷又
有白馬泉出縣西北四十里之白馬谷其水皆南
入澹河澹河卽滹水也水經注云滹水出代郡靈
丘上縣高是山卽嘔夷之水也高是山直縣西北與
枚迴嶺連麓接勢滋水經此嶺懸流五丈湍激之
聲響動山谷樵伐之夫咸由此渡巨木淪脊久乃
方出或落崕石無不粉碎滋水東南過石銘陁有
石銘其上云冀州北界其水又南逕侯塘川名也
又東合溫泉水水出西北暄谷其水溫熱如湯故
謂之溫泉焉東南流逕興豆亭北亭在南原上歆
傾而不正故世以歆城目之東流注于滹水又東
泉水注之水導源莎泉南流水側有莎泉亭東南
入于滹水又東逕靈丘縣故城南應劭曰趙武靈
王葬其東南二十里故縣氏之縣古屬代漢靈帝

光和元年中山相臧昊上請別屬地理志曰靈丘之號在武王前又按司馬遷趙敬侯九年敗齊于靈丘則名不因靈王事如漢注矣涖水自縣南流入峽謂之隘門設隘于峽以譏行旅歷南山高峰隱天深溪埒谷其水沿澗西轉逕御射臺南臺在北阜上臺南有御射石碑南則秀郭分霄層崖刺日積石之峻壁立矗上車駕每出所游藝焉魏土地記御射臺側有御射碑後魏文帝南巡至此路左有山高七百仞令群臣射之不過半帝乃射之箭過其頂三十餘仞落山南三百步遂刻石其碑

見存陰刊從臣姓名涖水又南流東屈逕北海王祥石碣南屈石柱北而南流○按志御射碑在縣南十里太白山上上有鐘乳穴其深不測仰望穴中乳如懸穗滴瀝在小石井內北海王諱祥魏文帝之子也石柱在縣東十五里之隘門山亦曰隘口今呼爲龍門枚迴嶺在縣西北之鹵城○靈寶許論九邊圖論曰大同古雲中地川原平行故多大舉之寇西則平虜威遠中則右衛水口等處皆稱要害蓋虜南犯朔應諸城必窺之路也東則天城陽和爲虜入順聖諸處之衝而平虜西連老營

堡與偏關近虜纔出套便涉其境故大同稱難守
焉近年多故大邊失守二境之內棄爲王庭墩軍
驕情警謀不明至有與虜通貨入而後報者他可
知矣以地利言則議者曰五堡決不可不復高山
聚落之戍是宜增以人事言愚以爲正紀綱明法
令今第一義也夫張文錦之敗是彼處置乖方而
激成之也李瑾之死則是處文錦之事未善而養
成之耳今日之事不震不驚爲天下目觀聽非豪
傑之士其孰能爲之吁可易言哉夫修五堡有三
利焉藩屏外固內地獲安一也沃土茂田富庶可
期二也二邊旣復宣寧等縣棄地亦可漸理三也
文錦失處而致變後人懲噎而廢食可乎高山聚
落二堡蓋在鎮城兩腋間實爲東西虜衝募軍分
駐則按伏之費省犄角之勢成無容別議顧募軍
之糧所宜亟補耳北虜貢路例在大同先襄毅巡
撫時三年兩貢各邊有寧宇者數年往歲榆林欵
塞說者謂似涉和議拒而不納亦典章之未諳也
夫北虜稱欵難矣反自疑阻然則歲歲侵暴而勞
費者是當然耶河南山西歲運多不及額而屯田
又多適負是故是食之計非例外發銀專官糴買

吾無策焉若夫馬之衰耗弊在各城搶兌此在軍之言當事者不可不知耳偏頭寧武雁門三關各稱要害而偏關逼近黃河焦家坪娘娘灘羊圈子等處皆套虜渡口往來蹂躪歲無虛日今防守之兵半是民壯馬又小弱非罔寺所兌者扶傷救死之不暇而責以敵愾之氣乎必不能矣或謂已已之變大同徵山西之兵防禦者蓋幾七千今在鎮城止供薪水門戶之役而坐糜糧餉分毫無益若改戍三關給以太僕之馬民壯數千盡爲除革此不惟邊防有賴而所省亦且不貲何者魏尚李廣

皆守雲中當日給士卒饗軍吏無所不周使廣遠斥堠就水草頓止人人自便是以能用其衆以制匈奴今之邊臣有能愛將士若此者乎先襄毅巡撫之日雖不敢擬諸古人至裁占役禁掊剋恤調遣優死傷未嘗不誠心以求之是以鎮人至今不能忘焉今平日恩德既無以結其志臨時節制又無以宣其威不幸有變遂因而爲姑息之政姑息必疑疑則阻威之不服而恩之不懷祇成一驕悍之習耳由今之道馭今之卒厝火積薪因以爲安吾不知大同所終也○輯畧云 國初封代王于

大同築大邊二邊以備胡虜宣德間又設東勝玉
林雲川衛所及豐州雲內榆林二縣置官吏兵民
以守之正統時主帥宴樂于樓子寨致虜突入接
戰不前遂將玉林移于右衛雲川移于左衛豐州
雲內縣民遷于應朔等處大邊二邊併衛所州縣
盡失之與諸胡連袂矣又川原平行虜騎馳驅朝
發夕至疾如風雨東犯則掠順聖諸城南犯則窺
應朔諸州論險隘雖各路俱衝而中東二路之北
及西路之新平堡更甚嘉靖三年巡撫張文錦議
築弘賜五堡尋以部軍作難中止嘉靖十八年總

督毛伯溫總兵周尚文相繼成之爲內五堡復增
設鎮羌等爲外五堡嗣是靖虜滅胡新平雲岡樺
林等堡先後修繕分副帥于西陲布列將于險要
各蒞以兵備使者而督撫建牙竝峙于百里之內
綢繆區畫已無遺策嘉靖末年俺荅強盛板升奸
民丘富等教以攻城之術右衛被圍者七月始解
攻尅墩堡屠掠之慘至今談之色變款市以來乘
暇修築沿邊垣墉屹然改觀三雲形勢非復昔日
殘破之舊矣第款貢四十餘年人狃于嬉惰法弛
于因循我之情形虛實虜備知之且板升逆黨邇

來蟻聚更繁儻一旦渝盟其害恐不止如往日者頃夷酋五路與素囊構隙彼此治兵謀欲相攻素囊召匠數百打造盔甲器械演放鳥銃極其精熟夫虜憚我者火器爾鍊器硝磺法禁森然沿邊奸民闖出無忌使中國之長與虜共之此他日莫大之患也豈可視爲末節而不嚴爲之防禁者乎○極衝平虜城大同右衛助馬堡新平堡井平堡大同城得勝堡天城城平遠堡保平堡鎮羗堡弘賜堡破虜堡滅虜堡寧虜堡威虜堡殺胡堡雲石堡威平堡威胡堡鎮川堡乃河堡迎恩堡高山堡○

次衝大同左衛陽和城朔州城永嘉堡靖虜堡鎮邊堡鎮虜堡鎮河堡牛心堡靈丘城馬邑城應州城懷仁城渾源城廣靈城○新平堡邊外黃台吉五路台吉青把都松木兒台吉段奈台吉哈木台吉等部落老小兵馬五萬餘精兵實有八千冬駐地名大同山離新平堡一百五十里夏移駐白海子北岸離本邊三百餘里極強悍○堡平堡邊外毛明暗台吉兵馬二千有餘冬駐地名北漢赤老鬼離堡四百餘里夏移駐無囊素太離邊六百餘里○守口堡邊外擺腰兀慎台吉老少兵馬一萬

餘精兵一千七百有餘冬駐地名哈喇圪蛇離堡
二百餘里夏移駐一克失人兒太離邊五百餘里
○鎮邊堡邊外兀慎台吉部落二千有餘冬駐地
名柳溝離堡六十餘里夏移駐龍會離邊三百餘
里○得勝堡邊外順義王三娘子老小兵馬約有
五萬歸化城駐牧離邊百有一十餘里○助馬堡
邊外打郎台吉等下老小兵馬約有二千離邊二
百餘里駐牧○施家口邊外不他失禮子素囊台
吉老小兵馬一萬有餘離邊一百里與三娘子駐
牧相去不遠○右衛殺胡堡邊外順義王下倚兒

將遜沙赤星老小兵馬約有三萬冬駐豐州灘昭
君墓離堡二百餘里夏移駐青山後失喇敖卜離
邊六百餘里○殘胡堡邊外順義王下打賴阿拜
台吉兵馬五萬餘冬駐地名忽車兔那林離邊二
百五十餘里夏移駐失喇跌不哈離本邊五百里
○威遠堡邊外反言黃台吉麥力艮台吉着力兒
台吉等老小兵馬約有三萬餘離邊約遠一千里
駐牧○那家堡邊外麥力艮台吉老小兵馬二萬
離邊約四百里○平虜衛邊外冷克木台吉哈台
吉宰生儻不浪打兒漢儻不浪老小兵馬二萬有

餘精兵實有八千冬駐地名哈喇兀南離邊三百餘里夏移駐青山後一克失人兒太離邊八百餘里○井平堡邊外哈木台吉兵馬約有一千離邊一百里駐牧○志云舊大同右衛城北四十里有蘇武廟子卿奉使匈奴時過此後人立祠祀之唐孫飛卿詩蘇武魂飛漢節前古祠荒樹兩茫然雲邊雁斷胡天月隴上羊歸塞草烟迴日樓臺非甲帳去時冠劍是丁年茂陵不見封侯印空向秋波哭逝川

山西名勝志卷之五終

壽

